

J'ho piasì 'd salutèv, cari siuri,
dop in ani ch'a suma luntòn,
perchè so che a Nadàl, senza curi,
s'ancuntrùma e s'a tnùma per mòn.

L'è che st'ani aurìjsu fè lûtu,
me, Gilindu, con tût ra famìja,
ma um smèja 'd senti 'na vus ben cunzia,
"làsala bùji, se 't vaj a serchè?"

L'è la vus ad Domenico Arnoldi,
per tonç ani in Gilindu magnìfich,
galantòmi, unèst e pacìfich,
semper pront ant er j òperi 'd ben.

Lû u j'è pû, ma sta sira, a Gilindu,
na sentùma per tût ra presènsa,
l'è con noi, el pò nenta stè sensa,
e nche me bsò ch'a fàssa u so nom.

L'era in omi cmè cui d'ina vota,
ch'us pudiva uardèj semp an fàcia,
l'ha lasà per tûç noi cmè 'na tracia,
a l'è basta ch'a fàsu cmè lû.

An avrìl j'uma vist in afàri,
j'hon bità la sità tûta an urdi
el person-ni j'amnìvu fin surdi
forsa 'd senti pichè da per tût.

U j'è mnì 'l Presidente Pertini,
'na person-na che guai s'im la gavu,
certi afè finalment dèss ij fàvu,
l'è da quond ch'l'era mnì Saragàt.

U s'avghìva 'n mac cul ch'l'era 'n sima
e Pertini u smiàva cuntènt,
dèss la roba l'è turna cmè prima,
fina quond ch'ùj ven 'n at President.

A Tirèn u j'è stacc in inchiesta:
certa gent i ciapàvu 'l tangenti,
uardè 'n pò sè ch'u bsò stè da senti,
e ch'el paga l'è semp Pantalòn.

Poi l'inchiesta s'è 'ncura slargàia:
se a Tirèn j'era d'cui ch'j mangiàvu,
an Ligûria e a Ruma j sbafàvu,
tont ch'el paga l'è semp Pantalòn.

E parlùma 'nche 'n pò 'd Licio Gelli:
quonç miliard ch'l'ha sfrusà sa person-na,
a l'è 'ndacc a finì 'n gavadòn-na
ant la Svissra, ma pò l'è scapà.

E pensè che 'nt la Svissra j afàri
j son semp tûç a post, tûç an urdi,
gent a mod, ùj n'è mèja d'angûrdi
e ùj n'è mèja ch'is làsù crumpè.

An Italia u j'è n'atra manèra
per fè sòrti 'd parsòn certa gent,
a l'è facil: se jèn l'è 'n galèra
bitli 'n lista, pò 'l va 'n Parlamènt.

E adès a parlùma d'ra moda
er prublèma u riguàrda 'na mà 'l doni
l'è da quond ch'j'era al mond el nost noni
che la vesta 'j fa semp tribilè.

Povri vègi, con cul vesti longhi
s'lamentàvu perchè j'eru strìci,
dis che l'orlu u strensìva 'l cavìgi
e d'anlùra j contìnuu a scòrsè.

Mèta pulpa, pò u snùgg, minigònna...
U smiàva sa 'l màsim anlùra!
scòrsa 'ncò, scòrsa 'dmòn, scòrsa 'ncura
j son quasi rivàji 'ns ra frònt.

Ina vota pr'el vùj 'd Lisòndria,
l'era bel spasigiè (ina vota!);
an curs Ruma, pò j'era la lota
perchè tûcc a j'aurìvu pasè.

Dès, anvèci, 'ndè 'n gir l'è 'n problèma
l'è mèj tènì sarà tûti er porti:
j son poch ch'j s'ancàlu 'ncur sorti
perchè j còn j'ampinìsu per tût.

E j dumèsticu propi is gram bèstij:
certi robi u bsò nent fèj an cà,
bsò spiciè 'n pò pi tardi, ns ra strà
e magàra 'ns in bel marciapè.

E per fè pi cumpleta ra festa,
per la gent ch'j sa spòstu 'n sità,
j pivion it bumbardu ra testa,
a l'è mèj stè sarà ben an cà!

An tra Pista, dop Piàsa Mentàna,
tònti auto j son begli anciudàji
perchè 'l sbàri j son semper saràij:
ùj n'è doi ad pasàgi a livèl!

A l'è 'n pès ch'j la stûdiu sta gron-na:
sut pasàgi, o sednò pasa 'n sîma!
dopo tonç ani l'è semper cmè prima,
jèn o l'ater l'è semper sarà.

Per risòlvi da bon ra facenda
con er j auto ch'j von e ch'j venu
j farròn che abulì tûç i trènu,
acsé 'l machini j poru pasè.

S'a uardùma 'n pò 'n gir, cari siuri,
ant er mond u j'è 'n mache del guèri
a 's gram Papa el va 'n tûti 'l teri
e u sa sforsa 'd purtèij ra pas.

Cula pas che da doi mila ani
l'è mnì j òngel da u ciel a purtèla;
'na gron roba, ma bsò meritèla
a l'è 'n mac 'na quistion 'd voluntà.

E augûrònda ra pas ans ra tèra,
cula pas ch'l'ha purtà u siur Mesia,
fas 'n'afàri: av presènt ra famìja,
pò cmensùma, e voi divertiv!